



Vischnaunca
Tujetsch

Protocol dalla 13avla radunonza da vischnaunca

dils 12 da november 2025

allas 19.00 ella Sala Cristalla a Sedrun

**Protocol nr. 13 dalla radunanza da vischnaunca dils 12 da november 2025 dallas
19.00 entochen allas 21.20 ella Sala Cristalla a Sedrun**

Presidi: Martin Cavegn (president communal)

Protocollista: Larissa Berther

Dumbravuschs: Silvio Schmid e Reto Schmid

Presents: 63

Perstgisas: Sabrina Suppiger-Hendry, meinascola

Tractandas

1. Avertura e beinvegni
2. Preventiv 2026
3. Orientaziuns
4. Varia

Tractanda 1 Avertura e beinvegni

Il president communal fa in cordial beinvegni a tuttas convischinas e tuts convischins sco era als commembers dalla cumissiun da gestiun tier la tredischavla radunonza da vischnaunca dil trienni 2023/2026.

Tractanda 2 Preventiv 2026

Il president communal constatescha che negin convischin giavischa ina debatta d'entrada, aschia ch'ei vegn directamein entrau ella tractaziun dil preventiv communal pigl onn 2026.

A maun d'ina grafica dil plan da finanzas (2024-2040) declara il president communal co il cash-flow vegni a sesviluppar ils proxims onns. El declara che – en cumparegliaziun cun avon 5 onns - seigi tut sestuschau per dus onns, specialmein il temps da grondas investiziuns ed il temps per entscheiver cullas amortisaziuns dil deivet a liung termin. Motiv persuerter seigien ulteriuras grondas investiziuns nunprevidas, sco per exempel la sanaziun dalla casa da scola a Sedrun. Quei ha medemamein per consequenza che la Vischnaunca Tujetsch vegn pér ad haver puspei ina facultad netta igl onn 2035 enstagl digl onn 2032.

La suprastonza communal ha tractau il preventiv 2026 a caschun da 7 sedutas e sa ussa mussar ora in gudogn mudest da frs. 12'400.00. Igl ei denton da risguardar ch'il quen communal vegni adina calculaus a moda plitost pessimistica. Plinavon ha la suprastonza communal decidu da sbassar il pei da taglia sin entradas e facultad da 95% sin 90%. Quei pass fuss buca staus logics sche la vischnaunca havess previu in quen negativ pigl onn 2026.

Il president communal fa attents ils convischins e las convischinas che las consequenzas dall'aboliziun dall'imposiziun da taglias sin l'atgna locaziun a caschun dalla votaziun dils 28-9-2025 seigien che la vischnaunca vegni ad haver meinsentradas naven digl onn 2025 da ca. frs. 400'000.00. La taglia sin objects (Objektsteuer) che sa remplazzar quell'aboliziun, per la quala il Cantun sto aunc scaffir la basa legala, savessi ulivar parzialmein quella sperdita.

Silsuenter explichescha il president communal singulas expensas per declarar al pievel ils pli remarcabels svaris ellas diversas spartas.

Schegie che las pagas dil personal administrativ ein carschidas considerablamein ils davos onns, muossa el a maun d'ina cumparegliaziun culla vischnaunca da Mustér, che quei svilup seigi giustificaus e fetg semeglionts en autras vischnauncas.

Silsuenter fa el attents silla gronda carschen d'expensas els secturs sanadad (+500% dapi igl onn 2000) ed ovras socialas (+150% dapi igl onn 2000). Plinavon declara el che las taxas per l'economisaziun dil rumien stoppien vegnir alzadas da 0.06‰ sin 0.08‰ per saver ulivar il fondo dalla finanziaziun speciala dil rumien. Per ina casa d'ina famiglia munta quei plicuosts da rodond frs. 20.00 ad onn.

Il president communal surdat il plaid a ses consuprastonts. Gerau Guido Monn pren il plaid e fa entginas explicaziuns davart differents projects che duein vegnir realisai ni silmeins iniziati igl

onn 2026. Leutier s'audan per exempel il passadi a Bugnei che sto vegnir sanaus (frs. 430'000.00), las sanaziuns dalla Via Bugnei (frs. 986'000.00) e la Via Romana (frs. 269'000.00), la sanaziun dils mirs schetgs a Giu Milà che vegn a cuzzar rodund treis onns (frs. 90'000.00 / onn, ½ surprenn il cantun) ni menar ils dutgs Flurin e Crestas (frs. 320'000.00) ch'era gia planisau pigl onn 2025. Motiv per spustar quei project sigl onn 2026 ei che las offertas inoltradas havevan surpassau considerablamein il credit approbau.

Silsuenter presenta Guido Monn dus projects che survargan la summa d'in miez milliun francs, numnadamein il niev scaldament Drun e la nova piazza da giugs Drun el center dil vitg.

Lu surpren il vicepresidente, Daniel Schmid, il plaid ed explichescha als convischins – specialmein alla giuventegna presenta – il project 'Parc da freestyle Dulezi' ch'ei planisau d'installar sut la halla plurivalenta Dulezi. El declara ch'ils scolars e las scolaras da Sedrun seigien stai involvai tier la tscherca d'ideas e ch'ins hagi priu sco referenza il parc da freestyle da Cuera. Ei setracti d'in parc multifunziunal cun differents livels per giuven e vegl. Ils cuosts da frs. 800'000.00 seigien vegni examinai da rudien. Ils obstachels da betun seigien da crear cun precauziun e stoppien esser fetg ulivs per saver garantir ils standards da segirtad per in parc da quei gener.

Silsuenter pren il president dalla cumissiun da gestiun, Silvio Schmid, il plaid.

El desista da leger avon il rapport da gestiun ch'ei publicaus el messadi – fa denton tuttina entginas remarclas. Als convischins ed allas convischinas declara el ch'il quen seigi calculaus pessimisticamein. Tuttina sappi la vischnaunca da Tujetsch mussar ora in pign gudogn – tgei che caztgi secapescha da far investiziuns. La suprastanza communal hagi previu plirs projects. Da quels seigien buca tuts vegni susteni dalla cumissiun da gestiun (principi da precauziun). Uonn hagi ei puspei dau plirs sbozs dil preventiv 2026. La versiun definitiva seigi vegnida elavurada el decuors da siat sedutas ed il preventiv seigi realistics ed ulivs.

El num dalla cumissiun da gestiun tschenta Silvio Schmid ina damonda critica alla suprastanza da vischnaunca. Ella sedamonda, schebein la sanaziun dalla Scola Sedrun seigi veramein indispensabla – cunzun arisguard la prognosa zun negativa da naschientschas ella vischnaunca da Tujetsch. Plinavon semuossa il president dalla cumissiun da gestiun plitost critics tier il project dalla piazza da giugs Drun e sedamonda, schebein quei liug fussi buc pli adattaus per ereger in hotel ni ina halla da parcar.

Alla fin pren Silvio Schmid aunc inaga la caschun d'engraziar alla suprastanza communal per la gronda lavur ed il ferm engaschi. Plinavon admetta el in grond engraziament ad Andri Hendry, il contabilist communal.

Avon la tractaziun dil quen communal pren il president communal cuort posiziun silla damonda davart la piazza da giugs. El declara che la piazza da giugs seigi predestinada per in liug da sentupada. Ei setracti dil sulet liug verd el center dil vitg che vegni numnaus curteseivlamein il Central Park da Sedrun. Quei duei era en futur restar aschia.

Lu repassa il president communal il quen communal da posiziun tier posiziun.

Tier la sparta "Economia publica" ei previu da dislocar il liug dall'alp da cauras e da sanar ina dallas sis tegias si Crest Stavlaz en summa da frs. 195'000.00 per schar vi als novs affittaders dall'alp.

En connex cul sbassament dil pei da taglia sin las entradas e la facultad da 95% sin 90% declara il president communal als convischins ed allas convischinas che tal ei dapi 35 onns buc vegnius adattaus. Igl onn 1990 era quel per la davosa ga vegnius alzaus dad 80% sin 95%.

Convischin Pius Cavegn fa la proposta alla radunonza da vischnaunca da spitgar culla sanaziun dalla tegia e da pér decider davart quell'investiziun cura ch'ins hagi anflau fittaders.

La radunonza da vischnaunca refusescha cun 43 encunter 7 vuschs e 2 abstenziuns la proposta da Pius Cavegn.

Votaziun:

- a) **La radunonza da vischnaunca approbescha unanimamein il preventiv 2026 dil quen da gudogn e sperdita dalla Vischnaunca Tujetsch cun in gudogn da frs. 12'400.00.**
- b) **La radunonza da vischnaunca conceda cun 60 encunter 0 vuschs (3 abstenziuns) ils credits bruts per novs projects ella summa da frs. 5'401'000.00 e las contribuziuns da frs. 614'200.00 (netto frs. 4'786'800.00) ed approbescha aschia il preventiv d'investiziun 2026 cun investiziuns totalas bruttas da frs. 5'281'000.00 e contribuziuns da frs. 1'371'000.00, pia investiziuns nettas da frs. 3'910'000.00;**
- c) **La radunonza da vischnaunca decida cun 59 encunter 3 vuschs (1 abstenziun) da reveder art. 1 dil regulativ da taxas tier la lescha davart l'economisaziun dils rumians cun augmentar la taxa fundamentala da 0.06‰ sin 0.08‰;**
- d) **La radunonza da vischnaunca concluda cun 54 encunter 2 vuschs (6 abstenziuns) da fixar il pei da taglia sin las entradas e sin la facultad per igl onn 2026 sin 90% dalla taglia cantunala sempla;**
- e) **La radunonza da vischnaunca decida cun 59 encunter 0 vuschs (4 abstenziuns) da schar il pei da taglia sin schischom per igl onn 2026 sin 1.5 ‰.**
- f) **La radunonza da vischnaunca pren unanimamein enconuschientscha digl extract dil plan da finanzas 2026-2030.**

Sin fundament dalla costituziun communal ston investiziuns che survargan in miez milliun francs vegnir suttamessas al referendum facultativ. Sin basa dil preventiv 2026 setracta ei dallas suandontas investiziuns:

- frs. 986'000.00 per la sanaziun dalla Via Bugnei
- frs. 555'000.00 pil remplazzament dil scaldament Drun
- frs. 950'000.00 per la piazza da giugs Drun
- frs. 800'000.00 pil parc da freestyle Dulezi

Tractanda 3 Orientaziuns

Plinavon fa el attents che la secunda procedura d'exposiziun en connex culla revisiun totala dalla planisaziun locala vegni ad haver liug il fevrer 2026.

Lu revelescha el als convischins ed allas convischinas ch'ei seigi vegniu suttascret in impurtont contract denter la Vischnaunca Tujetsch e l'armasuisse. Il militar ei obligaus da renaturar las sendas resp. las vias lateralas en Val Maighels ch'eran vegnidas baghegiadas e nezegiadas dall'armasuisse. Il contract reglescha che l'armasuisse conceda alla Vischnaunca Tujetsch ina summa da frs. 500'000.00 per baghegiar anavos las vias sigl intschess pertuccau en Val Maighels. Damai che la contribuziun finanziaria survarga frs. 80'000.00 ed aschia era las cumpetenzas finanzialas dalla suprastanza communal, vegn il contract suttamess al pievel a caschun dalla proxima radunonza da vischnaunca - tonaton ina fetg legrevla donaziun.

Il davos informescha il president communal davart il resort a Dieni. Il venderdis vargau seigi el s'entupaus cun Samih Sawiris e siu team ad Ursera per discutir davart ils proxims pass en connex cul resort a Dieni. Ei vesi ora fetg positiv, denton pli bia sappi el aunc buca dir, mo il pievel vegni il pli tard informaus detagliadamein il mars/avrel 2026.

Silsuenter pren genau Guido Monn il plaid. Muort lavurs da construcziun vid in edifices agricol a Zarcuns sto il trassé dalla loipa che traversa actualmein la parcella d'ina proprietaria privata vegnir stuschaus per entgins meters. Per quell'adattaziun seigi ei da quintar cun ina summa da ca. frs. 100'000.00. Sin fundament dil retardament dallas lavurs da construcziun sappi quell'adattaziun pér vegnir fatga il proxim onn.

Lu declara el che las lavurs vid la halla da deposit seigien terminadas, che las lavurs vid la casa da giuvenils s'avonzien bein e ch'ils cuosts hagian entochen ussa saviu vegnir risguardai sco planisau.

Tractanda 4 Varia

Treis convischins prendan il plaid sut varia.

Convischin Marcel Schmid ha duas damondas. Per l'ina vul el saver dalla suprastanza communal tgei che schabegi ussa cull'anteriura casa da scola a Rueras. Tenor el fuss ei d'engrau da crear egl edifices existent spazi da habitar sco a Sumvitg ni enta Medel.

Lu fa Marcel Schmid attents sils aults prezis d'energia. El hagi giu ina seduta cul president communal. Lez hagi detg ch'el vegni ad informar el suenter la seduta dil cussegl d'administraziun dall'Energia Alpina. Sinaquei hagi Marcel buca pli survegniu in resun e vegli ussa saver co ei vesi ora.

Ciril Deplazes, il meinafatschenta dall'Energia Alpina pren il plaid e dat sclariment a Marcel Schmid. Il prezi d'energia hagi saviu vegnir sbassaus per igl onn 2026 per 10%.

El declara che la branscha d'energia seigi regulada miniziusamein. L'EiCom sco survegiladra dils prezis d'energia controlleschi che tut sespleigi sco prescret. Ei regi il principi da tractar mintga client tuttina- pia negina discriminaziun.

La reit d'energia, tier la quala ei astga vegnir fatg negin gudogn, stoppi supportar sesezza. Dil reminent astgien ins far neginas subvenziuns transversalas.

A maun d'ina cumparegliaziun muossa Ciril co ils cuosts d'energia dalla Vischnaunca Tujetsch stettien en relaziun cun autras vischnauncas.

Ina habitaziun cun in diever da 4'500 kWh a Tujetsch vegni igl onn 2026 a pagar per il provediement d'energia ina summa da frs. 1'180.00, ferton che possessurs d'ina habitaziun en ina vischnaunca vischinonta pagan frs. 1'360.00 (+15% visavi Tujetsch).

Priu il cass ch'ins reducess per mintga client ils cuosts d'energia per 1 rp., savess il possessur d'ina habitaziun cun in diever da 4'500 kWh spargnar annualmein frs. 45.00. Viu sin l'entira Vischnaunca Tujetsch muntass quei ad ina sminuaziun d'entradas annualas per l'Energia Alpina da frs. 140'000.00.

L'Energia Alpina suondi la strategia da proprietari, qvd. pli pauc gudogn che l'Energia Alpina generescha e pli pintga la conderschida alla vischnaunca.

Ferton che l'Energia Alpina havevi avon dus onns aunc frs. 5 milliuns en cassa, vegni ins il 2026 ad empristar frs. 5 milliuns capital jester per saver far las investziuns neccessarias. La Vischnaunca Tujetsch vegn, il mument ch'igl entir indrez da Sedrun Solar ei cumpleinamein en funcziun (2029), a survegnir in'indemnisaziun annuala da rodund frs. 300'000.00 enstagl da frs. 150'000.00, quei muort bunas contractivas cun il partenari.

Lu appellescha el als convischins ed allas convischinas da visitar il niev local Aventura Energia e sincerescha che l'Energia Alpina detti tutta breigia e genereschi bia plivalur ord igl indrez fotovoltaic alpin Sedrun Solar. Las investziuns totalas per Sedrun Solar muntien a ca. frs. 85 milliuns. Ciril fa attents che rodund frs. 60 milliuns restien la finala el cantun Grischun.

Sco davos orientescha Ciril Deplazes ch'ils clients gronds d'energia (sur 100'000 kWh) seigien vegni envidai ad in'informaziun el local Aventura Energia che vegni ad haver liug ils 3 da december 2025 allas 17.00 per informar detagliadamein davart la calculaziun dils prezis d'energia e davart las pusseivladads restrenschidas per in sbassament.

Silsuenter pren il president communal aunc inaga il plaid en connex culla damonda davart ils prezis d'energia da Marcel Schmid.

El declara che las constellaziuns denter la vischnaunca, l'Energia Alpina, SedrunSolar, NalpSolar, la reit ed ils prezis d'energia seigien fetg complexas. Rodund 40% dall'energia da concessiun che nus hagien dabien dalla KVR mondien el quen dall'Energia Alpina per che lezza sappi sesviluppar vinavon e far las investziuns neccessarias. Quei tut seigi stipulau ella strategia denter la vischnaunca e l'Energia Alpina.

Lu fa il president communal la transiziun tier l'emprema damonda che convischin Marcel Schmid haveva tschentau en connex culla scola da Rueras.

El fa attents ch'ei vegnessi ina carischia da crear ord il baghetg existent habitaziuns. Motiv ei che la sostanza dil baghetg seigi aunc oz buna, denton buca sufficienta per far ordlunder spazi da habitar. Ei fagessi plitost senn da crear spazi da habitar sin in'otra parcella dalla vischnaunca. Il problem seigi buca che la vischnaunca hagi buca terren da baghegiar, mobein che negin prendi enta maun ils daners e la resca per crear spazi da viver per indigens. Il president communal informescha che la suprastanza communal vegni ad instradar ina gruppa da lavur che vegni ad elavurar propostas a caschun d'in workshop, e zuar davart co ins savessi utilizar il baghetg dalla scola da Rueras. El regorda ils convischins e las convischinas allas localitads dil schurmetg civil ch'ein situadas sut il baghetg da scola ed impedeschien aschia da far midadas cumpleinas en quei liug.

In convischin depona ina damonda resp. ina supplica en connex culla piazza da giugs a Rueras. Tenor el basegna la piazza da giugs exnum ina tualetta. Ils affons pigns sappien per gronda part buca tener da far lur basegns entochen vi tier il campadi. El fa la proposta da plazzar silla piazza da giugs ina sempla tualetta en fuorma d'in *Kompotoi*.

Il president communal declara ch'igl uorden culs indrezs sanitar seigi actualmein reglaus ella convegno denter la Vischnaunca Tujetsch ed il Camping Viva.

Gerau Guido Monn pren posiziun e declara ch'ins stuessi tuttina schubergiar il *Kompotoi*, schegie ch'ei setracti d'ina sempla tualetta. La pedela communal seigi gia vegnida incumbensada da schubergiar las tualettas dil campadi duront la denterseziun. El vegni denton aunc inaga a reponderar la situaziun.

In'auter convischin ha ina damonda en connex cullas uras d'avertura el Bogn Sedrun. El vul saver tgei temps resp. uras d'avertura seigien previ per la primavera 2026.

Gerau Pius Cavegn pren il plaid e declara ch'il Bogn Sedrun resti serraus per circa tschun entochen sis jamnas suenter las vacanzas da primavera dalla Scola Sedrun.

Quei vischin sedamonda vinavon daco ch'ins sappi buc serrar il bogn duront la sesiun d'atun. Leu seigien ils hotels tuttina serrai ed ei hagi en general pli pauca glieud en nossa val che la primavera. El fa attents ch'il diember da pernottaziuns duront la primavera seigien s'augmentadas ils davos onns ella Vischnaunca Tujetsch.

Gerau Pius Cavegn declara ch'el prendi bugen encunter il giavisch, mo fa tuttina attents ch'ils termins seigien gia fixai. L'aua vegni schada giu la primavera, ei vegni fatg revisiuns tecnicas ed il bogn cul wellness vegnien schubergiai miniziusamein per la sesiun da stad. In auter aspect impurtont seigi ch'il persunal dil Bogn Sedrun sappi buc far vacanzas duront la sesiun aulta d'unviern. Suententer quei temps intensiv seigi ei impurtont ch'ils luvriers sappien far liber per serevegnir.

Silvio Schmid orientescha che la cumissiun da gestiun seigi vegnida plidentada cuntinuadamein da convischins e convischinas en connex culs cuosts da perimeter. Il president communal hagi gia declarau pliras gadas la procedura da perimeter culla distincziun da cumparts privatas e cumparts publicas. Ils convischins sedamondien, schebein ins sappi trer giu dalla taglia las contribuziuns per las sanaziuns da vias. La cumissiun da gestiun hagi sclariu quei fatg. Ei seigi veramein aschia ch'ils pertuccai sappien far valer ils cuosts da perimeter en lur declaranzas da taglia.

Gerau Guido Monn selubescha da far il plaid final ed engrazia a tuts presents per l'emperneivla radunonza. El declara ch'ei seigi da prender en egl ch'enzacu vegni il mument ch'ins hagi difficultads d'anflar persunas che semettan a disposiziun pils uffecis politics en nossa vischnaunca. Lu drezza el in giavisch enviars ils convischins e las convischinas. El appellescha che quals che hagian interess da surprender ina funcziun en in gremi communal duein far aschi bien e s'annunziar tier la suprastonza communal.

Il president communal engrazia per la presenza, la participaziun e la confidanza. El siara la radunonza da vischnaunca allas 21.20 uras e giavischa in bien retuorn a casa.

Protocollista:
Larissa Berther

President communal:
Martin Cavegn